

Kejohanan Sukan Staf Antara IPTA ke-35 Senior UMS cemerlang

Oleh HENRY BATING

hbating@gmail.com

KOTA KINABALU: Pasukan Bola Sepak Senior Universiti Malaysia Sabah (UMS) cemerlang dengan memenangi tiga perlawanan peringkat kumpulan sempena Kejohanan Sukan Staf Antara Institusi Pengajian Tinggi Awam (IPTA) ke-35 yang berlangsung di Kompleks Sukan Universiti Sains Malaysia (USM) Pulau Pinang.

Dengan mengutip 9 mata, UMS menduduki tangga teratas kumpulan E diikuti Universiti Pendidikan Sultan Idris (UPSI), Universiti Darul Makmur (UDM), Pahang dan Universiti Pertahanan Nasional Malaysia (UPNM).

UMS bermula dengan baik pada perlawanan pertama dengan menewaskan UPSI 2-0 dalam

perlawanan 19 Jun lalu. Gol masing-masing dijaringkan Restu Emat dan Nelmon Jeoffery.

Dalam pertemuan dengan UDM, Restu sekali lagi beraksi cemerlang apabila mencipta hatrik. Seawal permainan, UDM mengejutkan UMS apabila menembusi gawang dengan jaringan pertama seawal minit ke-7 hasil jaringan cantik ketua pasukan UDM. Walau bagaimanapun UMS tidak menunggu lama untuk menyamakan kedudukan apabila lorongan cantik Nelmon gagal dibaca oleh pertahanan UDM yang tepat kepada Restu lalu dengan mudah menewaskan penjaga gol UDM. Restu berjaya menjaringkan dua gol lagi hasil kelincahan pemain sayap UMS, Ardi Sida

Awal pagi kelmarin, 22 Jun, UMS berpesta gol apabila menjinakkan UPNM 7-0. UMS menamatkan separuh

masa pertama dengan 5-0. Gol-gol dijaringkan oleh Rosmadi Wasli, Neldin Jeoffery dan hatrik oleh Rudi Boliku. UMS berjaya memperolehi dua gol lagi pada separuh masa kedua hasil jaringan Ardi Sida melalui semakan penalti dan ketua pasukan Faizal Marjus.

Dengan pencapaian tersebut, senior UMS akan berentap di peringkat kalah mati dalam pusingan berikut hasil undian mengikut sistem yang telah ditetapkan. Ketua Pasukan Bolasepak Senior UMS, Faizal Marjus, berkata mereka akan berusaha meneruskan kecemerlangan ini untuk mencapai matlamat menggondol pingat Emas yang telah lama dinanti-nantikan dalam acara ini.

Dalam peringkat suku akhir, UMS memulakan cabarannya dengan bertemu Universiti Islam Antarabangsa (UIA) 25 Jun bersamaan Jumaat ini.



PEMAIN SAYAP ... hantaran Ardi Sida (tengah) dari bahagian sayaphasilkanduagol.